

نومه دووم پطرس

۱

۱ آ شمعون پطرس، غلوم و رسول عیسی مسیح، به هُنون که به برکت عدالت خدا و نجات‌دهنده اُمون عیسی مسیح، ایمونه برابر پی ایمون اُمون نصیبتون بیسه: ۲ فِض و سلومتی به واسطه شناخت خدا و خداوند اُمون عیسی، به زیوتی پی شُمون با.

زندی مسیحی م پرتو دعوت الوهی

۳ قدرت الوهی او هر چیه که سی حیات و دیندوری نیاز دارم ور اُمون عطا کورده. یان ا طریق شناخت او میسر بیسه که اُمون به واسطه جلال و خوبی خودش خونده. ۴ او به واسطه هُنون و عدا عظیم و با ارزش خوشه به اُمون بخشیده، تا ا طریق هُنون شریک طبیعت الوهی بووه و ا فسادیه که ا نتیجه امیال نفسانی م دنیا وجود داره، رها بووه. ۵ سی دل یان، پی تلاش زیاد تقلا گنه تا به واسطه ایمون خوتون خوبی عمل آره و به واسطه خوبی، شناخت، ۶ و به واسطه شناخت، تسلط بر نفس و به واسطه تسلط بر نفس، استقامت و به واسطه استقامت، دیندوری، ۷ و به واسطه دیندوری، مر بروری و به واسطه مر بروری، مُحبت. ۸ سی یانکه وختی هُنون م وجود شُمون بوون و زیاد بوون، نم هِلن م شناخت خداوند اُمون عیسی مسیح، بی‌فایده و بی‌ثمر بووه. ۹ اما وانکه دیر ا هُنون، کور و کوتاهه بیته و ا یاد بورده که ا گناها گذشته خودش پاک بیسه. ۱۰ پ ای برارون، هر چه بیشتر تقلا گنه تا خوندگی و برگزیدگی خوتونه ثابت گنه، سی یانکه آر ایطو گنه آته سقوط نم گنه. ۱۱ سی یانکه ایطو، داخل بیسن م پادشوهی ابدی خداوند و نجات‌دهنده اُمون عیسی مسیح به زیوتی به شُمون عطا ببووه.

یادآوری حَقِّقَت

۱۲ پ ای امورَ هی به شُمون یادآوری بکنم، هر چن هُنونَ دونه و مِ او حَقِّقَتِه که پدا کوردیه، استواره. ۱۳ تا وختی که مِ ای دنیا فانی زندی بکنم، وظیفه خودم دوئم که ای نکتانَ به شُمون تذکر دوهام تا هُنونَ آ یاد نبره. ۱۴ سی یانکه دوئم زیتره دار فانی وداع بگووم، هموطو که خداوند اُمون عیسی مسیح مونَ آگا کورد. ۱۵ آ یان هر چی مِ توون دارم بکنم تا ترسه بووه بعد آ رحلتُم هی ای امورَ به یاد آره. ۱۶ سی یانکه اوسون که ظهور پُر قدرت خداوندمون عیسی مسیح به شُمون اعلام بکوریم، اَ دُما داستانا ساختگی نرفتم بید، بلکه عظمت و جلال اووه پی تیه دیدم بید. ۱۷ سی یانکه آ خدای بووه، جلال و اکرام پدا کورد و ندایه آ جلال و عظمت خدای بووه و شَ رسید که، «بیان کووک محبوبُم که آ او خشنوئم.» ۱۸ اُمون خومون سر او گو مقدس پی او بیدم و او ندا اَسْمونَ پی گوشمون شَنفتم. ۱۹ به علاوه، کلوم خلی مطمئن انبیان دارم که خوبه به وان توجه کنه، سی یانکه لفِ چراغه مِ محل تیره و تار بدرخشه تا اوسون که سپیده دمّه و ستاره سحر مِ دلالتون طلو گُنه. ۲۰ قبل آ هر چی، دونسه بایه که هیچ وحی آ کتابا مقدس زوییده تفسیر خود نبی نی. ۲۱ سی یانکه وحی هیچ وخت به اراده انسان اُورده نبیس، بلکه آدمون تحت نفوذ روح القدس آ جانوب خدا قصه کوردن.

۲

معلمون دُرو و هلاکت هُنون

۱ اما بن قوم، انبیا دُرو اُم بیدن، هموطو که بن شُمون اُم معلمون دُرو پدا بیوون که پنهونی بدعتا گُشنده بمیارن و حتی سروری که هُنونَ خریدّه، انکار بکنن و ایطو، هلاکتیه سریع سی خوشون بمیارن. ۲ خلیا آ فساد هُنون پروی بکنن و سی دل هُنون ره حق کفر کنن. ۳ هُنون آ طمع، پی توسل به قِصا فریبندّه، ا شُمون بهر مکنشی بکنن. اما خدا آ مدتا پش هُنونَ محکوم کورده؛ پ نابودیشون نزیگه.

۴ سی یانکه آر خدا ور ملاکویه که گُنا کوردن رحم نکورد، بلکه هُنونَ ته جهنم بس و مِ سیّه چالا توریک حبس کورد تا سی روز قضاوت هَلشون؛ ° و آر ور دنیا قدیم اُم رحم نکورد، بلکه ور او عالم بی دینون طوفون فرسندید و تینا نوح، او واعظ صالحی، پی هَف تن یگه حفظ کورد؛ ° و آر شرا سُدوم و غمورنَ خاکستر کورد و به نابودی محکوم کورد تا عبرته سی عاقوبت

بی‌دینی بووه،^۷ و لوط صالح که افساد بی‌دینون عذاب ببورد، رهویی بخشید -^۸ سی یانکه او پیا صالح هر روز بِن هُنون سر بکورد و روح صالحش آ دیدن و شُفتن رفتار زشتشون م عذاب بید -^۹ پ خاوند دونه چطو صالحون آ امتحونا رها کُنه و گناکارون سی مکافات روز قضاوت هله،^{۱۰} بخصوص هُنون که دُما امیال فاسد نفس خوشونن و اقتدار خداوند خوار بشمارن.

هُنون او طو گستاخ و متکبرن که آ توهین کوردن به گپون آسُمونی ترسه ندارن؛^{۱۱} در حاله که حتی ملاکون آم که قدرت و اقتدار بیشتره دارن، اصلا وخت اعلام محکومیت خداوند ور ای گپون، توهین نم کُین.^{۱۲} در مقابل، هُنون م اموره توهین بکُین که آ وان هیچ شناخته ندارن. هُنون لف و حوشه که شعور ندارن نینا تابع غریزا خوشونن و به دنیا اومنه تا م دوم اُفتن و هلاک بوون. پ لف و حوش آم هلاک ببوون^{۱۳} و در سزا او بدی که کوردنه، بد ببینن. تفریح هُنون عَش و نوش م روز روشناس. لکا ننگه هسن که حتی وخت شرکت م ضیافت پی شُمون، آ غرق بیسن م لذتا فریبنده خوشون دَس نم کُشن.^{۱۴} تیایه دارن پُر آ زنا که آ گُنا کوردن سِر نم بوون. ای ملعونون، کم ایمونون گول بزَنن و م حرص و طمع خلی ماهرن!^{۱۵} ره راس ترک کورده و پی در پیش گروفتن ره بلعام کووک بعور که مز ناروسی دوس داش، آ ره بدر بیسنه.^{۱۶} اما بلعام سی دل بدرفتور یاش آ زون الاغه توبیخ بیس. جoon بی زون لف انسان قصه کورد و ور لوی نبی آسار زَند.

^{۱۷} ای معلمون دُرو، چشما بی او و بخارا رونده آ طوفونن که توریکی مطلق سیشون مقررّه.^{۱۸} سی یانکه قِصا پی غرور و باطل بکُین و پی سود بوردن آ امیال نفس و شهوت پرستی، گسونیه که تازه آ چنگ گمراهون رها بیسنه، گول بزَنن.^{۱۹} به هُنون وعده آزودی بدهن، در حاله که خوشون بنده فسادن؛ سی یانکه، آدم بنده هر چیه که ور او مسلطه.^{۲۰} چو هُنون که پی شناخت خداوند و نجات‌دهنده اُمون عیسی مسیح، افساد دنیا رها بیسنه، آر آندو به وان گروفتار و مغلوب بوون، عاقوبتَشون بتر آ شرو ببووه.^{۲۱} بتر وان بید که آ شرو، ره صالحی نم اشناختن، تا یانکه بعد آ اشناختن، آ حکم مقدسه که به هُنون سُپورده بیس، ری ورگردونن.^{۲۲} پ هُنون مصداق ای مَثَل حَقِین که:

«سگ به استفراق خودش بورگرده»،

و

«خوک شسته بیسنه، به مغله خوردن م گِل.»

روز خداوند

۱ ای عزیزون، یان نومّه دوومّه که سی شُمون بنوسم. هر دو نومّه به قصد یادآوری نوشتنم تا شُمون به فکره سالم تشوق گنم،^۲ تا کلومیّه که پغمبرون مقدس م روزا قدیم گفته، به یاد آره و همیطو حکم خداوند و نجات‌دهنده اُمون که به واسطه رسولون شُمون گفته بیس.

۳ قبل آ هر چی، دونسه بایه که م روزا آخر کسونه که مسخره بگنن ظهور بگنن که پرو امیال پلید خوشونن و پی مسخره^۴ بگوون: «پ و عیده اومین مسیح چه بیس؟ آ زموئه که بوونمون موردن، همه چی هموطوره که آ اول آفرینش بید!»^۵ ایطو، هُنون عمدا ای حَقَقَت ندید بگرن که به کلوم خدا آسُمونا آ قدیم بید و زمین آ او و به وسیله او شکل گروفت؛^۶ و پی همی او، دنیای او زمون غرق و نابود بیس.^۷ و پی همو کلوم، آسُمونا و زمینیه که ایسون هسش سی تَش ذخیره بیسه و تا روز قضاوت و هلاکت بی دینون حفظ ببووه.

۸ اما ای عزیزون، آ ای نکته غافل مبابه که پیش خداوند یه روز لِف هزار ساله و هزار سال لِف یه روز.^۹ برخلاف گمون بعضه، خداوند م انجوم و عدش تأخیر نم گنه، بلکه پی شُمون صبورّه، سی یانکه نخو گسبه هلاک بووه بلکه مَخو کُل توبه گنن.

۱۰ اما روز خداوند لِف دُز برسه، که م او روز آسُمونا پی فریاد ترسناک آ بن بروون و عفتو و ما و ستارون آسُمون سوخته بیسه نابود ببوون، زمین و کُل کاراش دیار بدهن.

۱۱ پ ایسون که کُل هُنون ایطو نابود ببوون، شُمون چطو مردمه وا بووه؟ سی شُمون که زندی مقدس و خدایسندویه داشته بووه،^{۱۲} انتظار روز خدان گنیه و مشتاق رسیدن وان بووه. او روز باعث ببووه که آسُمونا م تَش گشیده بوون و نابود بوون و عفتو و ما و ستارون آ گرما ذوب بوون.^{۱۳} اما اُمون بنا بر وعده او پی شوق بندیر آسُمونه جدید و زمینیه جدید هسم که خونه صالحیه.

۱۴ پ ای عزیزون، ایسون که سی ای امور انتظار بگشیه، پی تلاش زیاد تقلا گنه تا م حضور او پاک و بی‌عب و م صلح زندی گنه.^{۱۵} و صبوری خداوند اُمون رستگوری دونسه بووه، هموطو که برار عزیز اُمون پولس آم مطابق حکمته که وش عطا بیسه، سی شُمون نوشت.^{۱۶} او م کُل نوما خودش ایطو بنوسه، هر وخت که آ ای امور قصه بگنه. نوما او شامل مطالبیه که درکش سخته و جاهلون و کم ایمونون تحریفش بگنن، هموطو که پی نوشتا مقدس دگه

ایطو بگنن و یان باعث هلاکتشون ببووہ.

^{۱۷} پ شمون ای عزیزون، ایسون که یان دونه، هوشیار بایه مبادا به ره نادرس بی دینون رووه و استقامتون آ دس ديه، ^{۱۸} بلکه م فض و شناخت خداوند و نجاتدهنده امون عیسی مسیح رشد گنه، که اووه آ ایسون تا ابدالآباد جلال با! آمین.

